

109 年全國語文競賽客家語朗讀文章國中學生組（四縣腔）

編號 03 號

【寫分考卷个心頭話】曾菁怡原作

熟事你幾下年，毋識聽你講過一句話，明知吾名姓，逐擺看著又過愛寫一擺分你看，實在毋知若心思。

熟事你幾下年，你總係愛自家理解若問題，係回答毋著，你就面紅濟炸膠變面，吾姆係知，就有竹筏仔好食。

熟事你幾下年，係看著你有淦淦个微笑，就天轉笠嫲花，歡喜到耐毋得，鞋底像有鋼弓仔¹，行路都會跳啊跳。

考卷啊考卷，吾个學生生活一路里來同你黏核核，剝都剝毋敢；你分又驚又怕，又充滿期待。驚怕毋知仰般回答若問題；又期待若問題全部在昨暗晡更深夜靜該下讀過。

考卷啊考卷，毋係異愛摻你見面，每擺約定見面个日仔係到咗，就企坐毋得，空氣像啗毋著，淋水還會哽著，胃肚像有一粒越來越大个雞胗仔，輕輕仔刺一下就會爆忒……。

恁得人惱个你係麼人發明个？先生試著你異要緊，爺哀總係記得你哪久會跔轉屋下，想愛摻你困起來就無法度。逐擺生日許願今年做得無考試，結果一擺都無實現；跔阿婆去拜伯公，同

¹ 鋼弓仔：音 gong giung' e'；彈簧。

伯公祈求先生个考卷會毋見忒，結果也無一擺成功。

該日寫毋出答案，你過譴到面紅濟炸，先生摻你交分該下講：「寫考卷係檢驗你學習个情況，毋使摻佢看做洪水猛獸²，寫毋著个地方恁愛加強學習，恁樣正會進步。」正知你背後个心思，點點滴滴就係愛幫助，原來誤解你恁久……。

故所開始改變學習个方法：先生還吉上課，就先復習內容；先生講解課程該下，就耳角角仔聽還將重點記下來；下課時間，會請教先生問題，抑係尋同學討論；放學轉到屋下，就煞猛讀書，複習今晡日先生教過麼个。日見日，愈來愈體會著學習个快樂同成就感，寫考卷也越來越有信心。

考卷啊考卷，頭擺對你个怨怪係對你無了解，總係摻你當做大精怪，發夢都想摻你扯爛爛。自從理解若用意了後，就將你當做學習溫度針，溫度忒低代表學習無罅，愛較認真兜仔；溫度提高，就表示有吸收先生教个內容，係對學習个肯定。

考卷啊考卷，感謝你督促認真讀書，會煞猛打拚分你有淦淦个微笑，毋會失望。

109 年全國語文競賽客家語朗讀文章國中學生組（四縣腔）

² 洪水猛獸：音 fung' sui' men' cu；洪水猛獸。

【紮祛把个阿九仔】陳米英原作

俗諺講：人總愛有手藝，就算打田打地也打毋忒你个好手藝哦！講著阿九哥，在頭擺歇个偏僻莊頭肚，大家對佢个印象係「癲九仔」，無就「戇九仔」。其實佢不癲也不戇，佢有一手紮祛把个好手藝哦！頭擺耕種人禾仔割起來，不管一甲地、兩甲地个穀擔，揸轉禾埕，晒穀个婦人家就愛一祛把、一祛把摺稈¹掃到淨淨俐俐。歸禾埕看著个係黃臘臘个穀，這係農家緊工時个景象。

一冬个收成，晒燥个穀除了出農會、糶兜分細人仔讀書繳學費以外，伸个揸轉屋下个穀倉堆起來，留等做伙食，這係一般農家个習慣。自知人我以來，兜歸大伙房就怎樣，年視年个莊居生活，一代一代傳承下來，這下有兜莊下人也還過等怎樣个生活。盡重要个係愛割禾个前成半個月，禾仔黃嘴咧、勾頭哩！大家就開始搭信分「阿九哥」，上家阿華伯愛五支，下屋阿乾叔愛兩支，隔壁个阿記哥愛五支，對門山个學老伯姆愛五支……，阿九哥係吾大阿姨个俵仔，毋使講佢也會留仔三、五支仔分兜用。

佢紮个祛把撈腹又經，實在有耐用。閒時佢就滿哪仔去銖²桂竹絲仔³紮祛把，紮好後一駁仔正載出去零賣，一臺老自行車，後背个車棚架仔輒常載到騎毋得，佢就用牽，上崎時較食力，佢會摺吾个吉讀書个老弟約好，在佢經過个路脣項等佢車仔，佢也會在褲頭項攝一包硬糖仔拐老弟，佢係一個出世「正」手正四隻手指，吾姨丈迷信講破相驚摺佢畜死忒，故所，直接同佢安名仔安到「阿九仔」。

隨等社會个進步，農家也已經大面積个機械化，割禾機在禾田項，駛過來，行過去，一袋一袋个穀包既經淨淨俐俐，毋使一晝邊个時間，一大片个禾仔就割好哩！祛把係頭擺農家人都會用著个，這下只有學校學生仔用來掃校園个樹葉仔，抑係社區活動整理環境時正用得著，還過乜無頭擺紮到恁撈腹、恁耐用吔，這紮祛把个傳統手藝，也跔等時代个進步失傳咧，留分个係思念阿九哥个認命，懷念佢殘而不廢个堅耐精神。

¹ 稈：音 gon` ngio´；稻草屑。

² 銖：音 lui；削取。

³ 竹絲仔：音 zug` se´ e`；竹桿節上生出的細竹枝。